

## Jugendfestred 2026, Metzplatz

Liebi Schüelerinne, liebi Schüeler, liebi Jugendfestbsuecherinne ond Bsucher

Wösse der, wer vor 98 Jahr (ede Stadtchele) d`Jugenfest Red ghalte het?

Das esch d`Sopfi Hämmerli-Marti gsi, die bekannti Mundartdichter, sie esch die 1. Frau ede Gschecht vom Länzborger Jugendfest gsi, wo het döffe e Red halte.

Sie esch erfreut ond glöckelech gsi händ *die Stadtröt vo Länzborg andersch dänkt* ond ehre als Frau d`Möglechkeit geh sech a *d`Jugendfestlüüt* zrechte. Das esch ehre nämli Wechtig gsi ond e dere Ziit alles anderi als sälbstverständlech.

Öbrigens, wosi vo Othmarsinge of Länborg zo ehrem Maa cho esch, händs als erschts grad do hende im Heumanhuus gwohnt, das esch das grosse gäle Huus.

Jez no es chorzes, passends Gedecht vode Sophie Hämmerli-Marti, es heisst:

### **Jugetfesttag**

En guldige Schin lit über de Wält:

S ärmscht Grötzli isch höt a d Sunne gstellt,

Schneewissi Meiteli, Rösli im Hag,

Fürroti Granate: s isch Jugetfeschttag

Au me freuts, dafi scho mängs Jahr för mini Chend Astecker, Chränzli ond Strüssli mache för de spezielli Tag...

Bsonders Freue duez mi au, dasi sed letscht Jahr Ortsbürgerin vo Länzborg be, zäme mit minerer Familie. För eus esch Länzborg Heimat, do fühle mer eus wohl, send vertrout met de Lüüt ond gnüsse + fiire so Aläss wies Jugendfest!

Sozäge **forever happy**, (Thema vom diesjährige Fotofestival Länzborg )

Was bedüdet för euch liebi Schüelerinne ond Schüeler **forever happy**? Oder chorz gseid: **happy si**? Grad au met em Zämehang zom Jugendfest...? Nömme sone stränge Stondeplan, **happy si** esch weder es Schueljahr gschaftt, d Vorfreud of d`Voröbe...chont ächt De oder Die au, womer immer chli Härzchlopfe öbchont, wenn mer sech gseht...

För de Omzog chamer sech so richtig chic mache, (usepotze)...met em wiisse Rock oder em Hömli ond de schöne Blueme...

**happy si** esch ändli weder Manöver, do gets jo velecht au dere onder euch wo 1. mol metmache, a dem Landschaftstheater.

Ond wenn de ändli ändli die Bahne ofem Lunapark laufe ond mer zäme cha das feeling gnüsse ond eifach **happy sii...**

Am Obe, wenn mer doch schochli müed esch vo dene ganze Idröck wo eim **happy** gmacht händ, stoht no de letschti Höhepunkt vo dem Tag a...s`Füürwärg i sinere ganze Pracht! Ond alli wösse, wenn de Wasserfall chont esch definitiv Schloss ond mer cha zfrede, müed ond **happy** go schlofe

S`Jugendfest lüütet aber au die lange Sommerferie i....denn eschmer **happy** chamer usschlofe, mol chli meh chille ond game ohni das d`Eltere grad öpis säge..velecht gots ed Ferie neume he, womer scho lang devo Träumt het oder es chont eim öper go Bsueche womer scho lang lang nöme gseh het...all das send Momänt zom **happy sii**, halt ned grad **forever**, aber secher zom sech dra zrogg erinnere wenn mol ned grad alles **happy** esch im Läbe...

Er döfed au **happy si** met euch sälber, liebi Schüelerinne ond Schüeler, er händ scho einiges erreicht: grad aktuell die Woche händ er euch 2 Täg is Züg gleit ond Kränzlet wie di Welde, das eusi Stadt so schön gschmückt het chönne wärde, das hani sogar met euch zäme döffe erläbe. Ond au ede Schuel gots vorah, bald stönd ehr vorere 1. wechtige entscheidig i euchem Läbe oder send scho grad zmetzt inne. Machi e Bruefslehr oder goni no wiiter ed Schuel, esch d`Frog. Velecht bruchts au 2, 3 Schrett meh bes mer as Ziel chont oder eventuell müend ehr au mol weder 1 Schrett retour mache ond denn e andere Wäg ischloh.

Egal i weli Rechtig das er gönd, vergäsed ned euchi Heimat, s`Jugendfest ond die verschedene **happy Momänt** woner erläbt händ oder velecht danke der jo sogar a die **happy** Jugendfestred zrogg.

Min **happy Momänt** esch, wenn ich jetzt de die Red döf schlüsse ond eus allne es **happy** Jugendfest cha wönsche...es Jugendfest mit Manöver wo velecht **forever** ed Gschecht igoht, falls d`Freischare würde gönne!!